

sinuati, feminae in latera capitis minus longe extensi, maris quam feminae multo longiores. Rostrum coxas intermedias vel posticas attingens, articulo primo dimidium xyphi attingente. Antennae prope apicem oculorum interne insertae, articulo primo apicem clypei haud vel paullo superante, secundo pronoti latitudine basali (plerumque multo) brevior, saltem articulis duobus primis nigris. Pronotum breviter trapeziforme, lateribus rectis vel sub-rectis, margine apicali levissime sinuato, disco sub-horizontali vel apicem versus vix declivi, callis discretis, distantibus, saepe discoloribus. Mesosternum apice truncatum. Hemelytra completa, membrana bi-areolata. Pedes femoribus punctis nigris omnino destitutis, tibiis spinulis nigris, interdum e punctis vix distinguendis nascentibus, armatis; tarsis longioribus obscuris, posticis articulo tertio secundo longiore vel fere longiore. Segmentum maris genitale subtus muticum, terebra feminae medium ventris paullo superans.

1. *Maurodactylus instabilis* REUT.

Diagnosis: Colore varians, supra nigro-pubescens, pilis fragilibus argenteis intermixtis, subtus pallido-pubescens; antennis articulis duobus primis nigris vel nigro-fuscis, ultimis albidis; tarsis articulo tertio secundo longiore. Long. ♂ 4, ♀ 3½ mm.

Var. α: Supra obscure sanguinescenti-fusca, capite dilutiore, clypeo nigro; embolio cuneoque saturatus sanguineis; membrana fumata, vena brachiali fuscescente vel grisea, venis cubitali et connectente sanguineis, areolis totis infuscatis, vena cubitali extus fusco-marginata, nebula extra apicem areolarum obscurius fuscescente, macula parva ad apicem cunei hyalina, striola juxta venam brachialem nigra; pectore abdomineque piceo-nigris; pedibus rufescenti-ferrugineis, tarsis fuscis. ♀.

Var. β: Subtus nigro-fusca, supra pallide griseo-flavescens, capite, margine postico excepto, callis pronoti et plerumque etiam basi scutelli dilute fuscescenti-ochraceis; hemelytris unicoloribus, membrana sub-hyalina, venis pallidis, areolis limboque externo infra maculam hyalinam ad apicem cunei positam late fumatis, striola angusta externa juxta venam brachialem nigricante; pedibus pallide testaceis, tarsis fuscescentibus, articulo ultimo fusco. ♂ ♀.

Var. γ: Ochracea, supra pallidior, pronoto basin versus hemelytrisque dilute albicanti-ochraceis, embolio cuneoque ochraceo-flavis; membrana infumata, venis albidis, areolis totis limboque externo infra maculam ad apicem cunei positam late triangulariter nigricantibus; pedibus flavo-testaceis, tarsis fuscis. ♀.

Hab. in Turkestan!, D. FEDTSCHENKO.

Descr.: A speciebus generis *Psalli* FIEB., quibus nonnihil similis, oculis laevibus, callis pronoti magis discretis, femoribus et tibiis punctis obscurioribus omnino destitutis